

## “ზენიტი” (ლენინგრადი) – “დინამო” (თბილისი)

დაიწყო მიმდინარე წლის საკავშირო პირველობის გათამაშება ფეხბურთში. პირველი კალენდარული მატჩი თბილისში ჩატარდა 2 მაისს. ამ დღეს ლ. პ. ბერიას სახელობის სტადიონის საფეხბურთო მოედანზე ერთმანეთს შეხვდნენ ლენინგრადის “ზენიტისა” და თბილისის “დინამოს” სანიმუშო გუნდები.

ანგარიში გაიხსნა პირველი ტაიმის მე-15 წუთზე. პაიჭაძის მიერ მოხერხებულად მიწოდებული ბურთი ზუსტად გამოიყენა ჯეჯელავამ და გაახვია იგი “ზენიტის” კარის ბადეში. საპასუხო ბურთის გატანა სტუმრებმა ლამაზი კომბინაციით შეძლეს ტაიმის დასასრულს.

შეჯიბრების პირველი ნახევარი დამთავრდა ფრედ – 1:1.

მეორე ტაიმის დასაწყისში ლენინგრადელებმა გააძლიერეს ტემპი. 25-ე წუთზე მათ ისარგებლეს ფროლოვის შეცდომით და გარღვევაზე გასვლით გაიტანეს მეორე ბურთი.

თამაშის დამთავრებამდის სულ 8 წუთილა დარჩა. თითქოს წააგეს თბილისელებმა მატჩი, მაგრამ აი რამდენიმე ხელსაყრელი მომენტი და დინამოელებმა გაათანაბრეს ანგარიში – 2:2. “ზენიტის” დამცველთა რიგებში დაზნეულობამ იჩინა თავი. ამით ისარგებლა ბერეჟნოიმ და გაიტანა მესამე ბურთი, ხოლო ტაიმის მიწურულში საჯარიმო გარტყმით გაგუამ გაადიდა ანგარიში.

პირველი კალენდარული მატჩი დამთავრდა თბილისის “დინამოს” გამარჯვებით, ანგარიშით – 4:2.

**“ახალგაზრდა კომუნისტი”, 5 მაისი, 1940 წ.**